

Mini komentar: Premijera sjećanje slabo služi, kao i savjetnike! (Foto)

Povodom osvajanja duple krune u ženskoj košarci u Bosni i Hercegovini, premijer Tuzlanskog kantona Jakub Suljkanović i ministrica kulture, sporta i mladih Slavena Vojinović upriličili su nedavno prijem za stručni štab i košarkašice ženskog košarkaškog kluba BMU Banovići.

Lijep gest premijera i ministrice, ali se Suljkanović propisno obrukao nepoznavanjem stanja u kantonalnom sportu.

Među ostalim, izjavio je:

– Ne doživljava se svaki dan da Tuzlanski kanton ima osvajača “duple krune”. Koliko se ja sjećam ovo je prvi put u posljednjih tridesetak godina da imamo osvajača duple krune s područja Tuzlanskog kantona u bilo kojem sportu – rekao je premijer Suljkanović ističući značaj ovog sportskog uspjeha.

Reče to Suljkanović bez puno razmišljanja i – ostade živ!

Može se desiti da premijera pamćenje slabo služi, može biti i da ne zna, ali nedopustivo je da ne znaju njegovi dobro plaćeni sasvjetnici.

Od rata naovamo u Tuzli su se osvajale brojne “duple krune”. Ako nas pamćenje dobro služi, u posljednjih 30 godina duple krune su osvajale odbojkašice Jelovice Tuzle (2006.), i to u finalima protiv Bimal Jedinstva, najuspješnije odbojkaške ekipe BiH u novijoj historiji.

“Duplu krunu” osvajali su i rukometaši Sloboda Solane, zatim, kuglaši Slobode, koji su uz tri naslova prvaka osvojili po dva Kupa BiH i Kupa Federacije, okitili su se “duplom krunom” i košarkaši Sloboda Dite, mada u vrijeme dok se još nije igrala zajednička košarkaška liga.

Rukometašice Jedinstva četiri puta su osvajale Kup BiH i mnogo više naslov prvakinja, a bilo je i “duplih kruna”.

I da ne nabrajamo. Nije sport u TK počeo od aktuelne Suljkanovićeve vlade i Kukiinog PDA, pa kad se već nečim treba pohvaliti, treba porazmisliti i prvo skočiti, pa tek onda reći “hop”.

Premijeru, naložite savjetnicima malo više truda i pažnje, kad Vam pripremaju podatke za prikladna obraćanja.

Inače, košarkašice RMU Banovića zaslužile su sve čestitke za veliki uspjeh u tek završenoj sezoni. (mp)

Date: 10-05-2018